

18. novembari 2015

**Ujaqqat erlinnartut pinneraasiassat Nunatsinni piarneqarsimasut Nunatsinni sileqqaarlugit nunatta avataanut anninneqartarnissaannik piunasaqaateqalernissaq pillugu apeqquteqaat aallaavigalugu oqallittoqarnissaanik siunnersuut.**

(Inatsisartunut ilaasortaq Peter Olsen, Inuit Ataqatigiit)

Siumuminngaanniik siullermik oqaatigissuarput nuannaarutigigatsigu nunatsinni aatsitassarsiorneq ukiuni arlaqartuni inuussutissarsiutit ilaattut sulissutigisarput maannakkut piviusunngornissaa qanilliaruaarmat.

Nunaqqaterpassuatta aatsitassarsiorneq suliffeqarfigissallugu soqutigigaat malunnarpoq. Ilaatigut Sisimiuni Aatsitassarsiornermik ilinniarfimmi pikkorissarsimasut amerlassusaata takutippaa, soorluttaaq aatsitassarsiorfinni suliffissarsiornerit tamanna takutikkaa.

Taamatuttaaq annikitsumik aatsitassarsiornerissamik akuersissutaatillit amerliartortut takuneqarsinnaavoq.

Aamma siunissaq qaninnerusoq ungasinnerulaartorlu isigalugu aatsitassarsiornermi suliniutit arlaqartut aallartinnissaat, assersuutigalugu Nunatta kangiata avannaarsuani Citronenfjordimi, nunatta kujataani Kuannersuarni aammalu Maniitsup timaani nickelimik piiaanissamut misissuisut.

Ukiuni makkunani nunatta aningaasanik pisariaqartitsiffiata nalaaniinnitsinni , pisuussutit uummaatsut sulisartukkormiunut, suliffeqarfinnut minnerunngitsumillu nunatta karsianut iluaqutaanissaat pisariaqarlunnarpoq.

Oqallisissiami siunnersuuteqartutuulli nunatta pissarsinissaa annertunerpaaffimminiinnissaa ujjartortuassagipput isumaqataaffigaarput.

Aamma ujaqqani pinneraasiassani taamaappoq, taamaattoq ujaqqat pinneraasiat qanoq nunatta pissarsiffigisinnaanera assigiinngiaartumik inissisimavoq, pissutsit assigiinngitsut ilaatigut Naalackersuisumiit taakkartorneqartut pissutaallutik, ilaatigut aamma nunaqqatitta isertitaqarnerat ujaqqanik suliarineqanngitsunik tunisisarnermik tunngaveqartoq ilisimavarput.

Siumumiit oqaatigisariaqarparput isumaqannginnatta inatsimmik sukaterinissaq maannakut piffissaasoq.

Taamaattoq ineriartorneq ilutigalugu qanoq suli pitsaanerusumik aqqissuussisinnaaneq oqaloqataaffigissuarput, aammalu nalilersortuarlugu.

Ilaatigut Siumumiit misilittakkat pioreersut, aammalu annikitsumik aatsitassarsiorneq pillugu suliaqarluni ataatsimiititsineq novembarip naanerani pisussaq qilanaaraarput sunik oqariartuuteqassanersoq.

Taamaatut oqaaseqarluta oqallisissiaq tusaatissatut tinguarput, maannakkuungallartorlu ilalernartinnagu.

Qujanaq.

Jens-Erik Kirkegaard, Siumut.